

Dumonda Crameri concernent la serrada dal pass da l'Alvra durant l'enviern

Il pass da l'Alvra unescha la Val d'Alvra cun l'Engiadina ed è ina colliaziun da traffic impurtanta per tuttas duas vals. Per motivs da segirezza è la via dal pass serrada durant l'enviern per il traffic sin via; durant la stad vegnan quintads passa 1000 passadis per di. Gist ord vista turistica è il pass da l'Alvra d'ina impurtanza speziala particularmain per la Val d'Alvra dadens. Betg da sutvalitar n'è er l'impurtanza economica dal pass, cunzunt per il commerzi e per la mastergnanza: In viadi da Bravuogn a San Murezzan sur il Güglia dura in'ura e 14 minutas (63,5 kilometers), entant ch'el dura sur il pass da l'Alvra in'ura e tschintg minutas (37 kilometers). In viadi da Bravuogn a Puntraschigna sur il Güglia dura in'ura e 23 minutas (71,3 kilometers), entant ch'el dura sur il pass da l'Alvra in'ura e tschintg minutas (35 kilometers). Fitg evidenta è la distanza cun Scuol en l'Engiadina bassa (tant pli ch'er las colliaziuns da viafier ord la Val d'Alvra en l'Engiadina bassa èn fitg nauschas e ch'i ston vegnir prendids en cumpra temps da spetga pli lungs da fin ina mesa ura): Quest viadi dura sur il pass dal Güglia duas uras e 13 minutas (124 kilometers) respectivamain sur il pass dal Flüela duas uras e 31 minutas (85 kilometers) e sur il pass da l'Alvra in'ura e 40 minutas (69 kilometers).

Er sche quest onn èn gia avertas tut las vias da traffic sur ils pass da muntogna grischuns, resta serrà il pass da l'Alvra per il traffic sin via fin quasi mez zercladur. Quai signifitga ina gronda perdita economica cunzunt per la Val d'Alvra influenzada dal turissem, che profita activamain dal traffic sur il pass. La durada dal pass serrà durant l'enviern sto perquai vegnir reducida ad in minimum.

Sut quest aspect sa drizzan las sutsegnadras ed ils sutsegnaders a la regenza cun las suandantas dumondas:

1. È er la regenza da l'avis ch'il pass da l'Alvra è ord vista economica e turistica da gronda impurtanza per la colliaziun tranter la Val d'Alvra e l'Engiadina?
2. Tge mesiras ston vegnir prendidas per reducir la durada dal pass da l'Alvra serrà durant l'enviern?
3. È la regenza pronta da prender las mesiras menziunadas qua survart?

Puntraschigna, ils 13 da zercladur 2019

Crameri, Schutz, Aebli, Alig, Berther, Berweger, Bigliel, Bondolfi, Brandenburger, Brunold, Caluori, Cantieni, Casutt-Derungs, Cavegn, Censi, Claus, Della Cà, Deplazes (Rabius), Derungs, Dürler, Ellemunter, Epp, Fasani, Felix, Flütsch, Gasser, Geisseler, Giacomelli, Hardegger, Hartmann-Conrad, Hefti, Hohl, Jochum, Kienz, Kohler, Kunfermann, Kunz (Fläsch), Loi, Maissen, Märchy-Caduff, Müller (Susch), Natter, Niggli (Samedan), Niggli-Mathis (Grüsch), Noi-Togni, Papa, Paterlini, Pfäffli, Ruckstuhl, Rüegg, Salis, Sax, Schmid, Thomann-Frank, Thür-Suter, Tomaschett (Breil), Tomaschett-Berther (Trun), Ulber, Weber, Weidmann, Wellig, Widmer (Favugn), Wieland, Zanetti (Landquart)